



湘軍記

KF8  
2.270  
2



門 伊  
號 2270  
卷 2



湘軍記卷四

東湖王定安撰

援守江西上篇

自洪楊竊據金陵論者率以楚皖形勝所在宜從上游擊  
楫東下成席卷之勢江右偏一隅非所必爭  
朝廷固亦未嘗深措意然江忠源之赴江南中道改轍南  
昌曾國藩之克武漢  
文宗卽獎以取金陵國藩毅然居之不疑比攻九江不克  
水師陷內湖崎嶇章穎間幾困憊不自振卒從羅澤南議

湘軍記

卷四

分軍出武昌與賊爭中流而後大局有轉圜甚矣湘軍之不能卽克金陵者由江西誤之也要其危亡相救開關險阻戰績亦惟江西爲多曾國荃左宗棠勛伐烜赫一時而援皖之師起吉安謀浙之兵起廣信其大功皆自江西始也當蘇杭淪陷國藩總制兩江所轄糜爛無完土專責餉江右巡撫時與牴牾不相下至盛氣相揭參故江西者亦湘軍得失之林也初江忠源以楚勇轉戰粵湘最知名咸豐三年二月

詔忠源佐向榮軍事疏請練軍三千助剿四月師發湖北

次九江阻賊弗能進巡撫張芾聞忠源至則飛檄召援省城時僞丞相賴漢英石祥貞犯九江湖口僞豫王胡以昞陷安慶爲聲援忠源倍道赴南昌張芾奏以軍事屬之忠源策賊自東北來德勝章江二門當其衝以楚軍分守而令九江鎮兵與新募鄉勇駐永和門外扼城西南相犄角縱火燎城外民廬未燼而賊至反相撲救賊在湖南頗畏江家軍比見楚軍旗幟皆大驚忠源與巡撫設守禦旣具復毀附郭女牆賊不能隱匿稍遠引依文孝廟築三壘三面繚牆而虛其後以翼蔽賊舟江西初被寇兵勇不習戰

事忠源所部楚勇千三百人每四五堞以一楚勇督數守卒有縋城逃者輒斬以徇於是軍律稍整城守始固賊潛以礮夫穴地忠源屢掘所爲隧道壘石爲月城以備六月賊由他道穴德勝門地雷發城坍六丈忠源弟忠濟率死士數百當缺處以布囊盛土築之俄而城大崩築者盡陷忠濟躍免而壘土益急城復完越數日賊復埋地雷轟城羣賊呼而登忠源督兵堵殺登者盡殪乃鑿濠護城引水注之賊隧道盡廢始大阻先是忠源以書走湖南乞師曾國藩國藩方治軍長沙念湘勇新立營哨皆諸生未經行

陣楚勇夙驍健能戰忠源弟忠淑習江家營制令爲先導乃與巡撫駱秉章謀檄寶慶知府魁聯增募楚勇二千以忠淑領之由瀏陽進羅澤南所練湘勇千二百以朱孫貽領之郭嵩燾與之偕由醴陵進道員夏廷樾將營兵六百爲總統七月廷樾等至南昌諸生見賊爭搏戰死者七人國藩雖聞敗頗悅以爲諸生果可任非綠營巧懦者比也適吉安土匪起陷安福泰和忠源白巡撫請令楚軍三千往眾不可忠源堅持之以夏廷樾駐章樹劉長佑攻泰和羅澤南攻安福悉破平之於是湘勇漸習戰陣與楚勇埒

矣。是時賊船以萬計，往來饒瑞，飄忽擄掠。長江及內湖江路皆爲賊踞，而官兵無一船。郭嵩燾從忠源守章江門，訊據賊供，所至皆舟居，所築賊壘皆以護船。官兵至，始列隊以守。因言之忠源，東南皆水鄉，賊踞有江路，而我以陸師擊之，其勢常不相及，必與賊爭長江之險，而後可以制勝。非造戰船，無可言戰。忠源大懼之，卽令嵩燾具疏請飭湖南湖北四川各造長龍快蟹船二十艘，卽令廣東購大礮千尊，配給各船，卽日馳奏奉

旨允行。水師之興自此始。嵩燾以江西被圍久，造船工程

非刻日可期，當造巨筏，可容數百人，列礮其上，與陸軍夾岸衝擊賊船，應倉卒之急。筏成而賊解圍遁，其後用以塞湖口者卽此筏也。八月，賊揚帆北走，南昌解圍，眾歸功忠源。湘楚軍名始大顯。會其部曲索餉大譁，健者多亡去。賊出湖口，復上犯，忠源亦自九江回援湖北，戰於田家鎮，失利。賊陷黃州、漢陽、沂江、漢上，犯全楚，皆震。十月，羅澤南等軍還湖南防守，未幾，忠源爲安徽巡撫，殉難。廬州湘軍始議東征。

四年正月

詔促曾國藩援鄂率萬七千人以行六月武昌陷七月湘軍發岳州八月克武昌漢陽

詔曰楚省大局已定亟應分路進剿由九江安慶直抵金陵沿江剿賊事責之曾國藩楚省防務責之楊霈於是國藩乘勝東徇黃州諸屬邑耀兵九江九江者北枕大江南負匡廬西通楚東接皖吳爲江西門戶湖口又鄱湖之門戶也僞翼王石達開在安慶與九江湖口聲勢相聯我軍水師介處賊營中與陸軍隔絕礮艇往來賊壘丸彈落船倉纍纍可掃晝夜戒備終莫肯退十月江西水師禦賊姑

塘敗績失戰艘四十餘十一月塔齊布彭玉麐敗賊小池口燬其龍開河木城水師進屯湖口國藩疏言逆賊屢以民船致敗近在安徽仿我船式造戰艦三十餘益以江西搶去之船其氛益熾若使梗塞鞋山孤塘閒我軍與江西咫尺不能相通可慮者一賊黨分踞南北岸臣等陸軍單薄在南不能顧北渡北不能顧南若往來頻渡疲於奔命銳氣銷磨可慮者二必待楊霈師至北路足資堵禦然後全師渡江以圖潯郡疏入

文宗憂之飭湖北江西派兵會剿丁丑塔齊布彭玉麐破

賊孔龍驛己卯李孟羣彭玉麐破賊小池口燬洲上賊壘  
及船筏幾盡癸未李孟羣敗賊湖口丙戌羅澤南由白水  
南渡追賊九華山燬其壘十二月乙未朔國藩親督軍  
攻九江不克參將童添雲攀堞登中礮而殞軍士傷亡二  
百餘庚子羅澤南胡林翼敗賊梅花洲彭玉麐敗賊湖口  
甲辰澤南林翼復攻梅花洲敗績玉麐水師至焚賊船三  
百餘丙午蕭捷三等水師三營越湖口攻姑塘賊出小舟  
燒其坐營遂陷鄱湖不能還是爲內湖水師乙卯湖口賊  
北渡復踞小池口己未賊以小艇夜襲營奪國藩座船國  
藩自投水左右救之掉小舟入羅澤南營因上疏自劾  
詔免議癸亥塔齊布李續賓蔣益澧自九江北渡攻小池  
口敗績

五年正月戊辰東北風大發損師船四十餘石達開以潯  
城被圍遣僞貞天侯林啟容助守啟容懼官軍匿不出僞  
丞相羅大綱踞北岸促之戰庚午啟容率悍黨千餘犯王  
國才營大綱從小池口渡江助之國才偕畢金科開壁奮  
擊追之鎖江樓塔齊布方鑿地道與賊戰併力躡其後賊  
爭北渡多斃於水羅大綱遁入潯城時楚事棘曾國藩以

圍潯之師分道赴援。胡林翼王國才石清吉率六千人陸行趨武昌。李孟羣彭玉馨水師百三十艘溯江西上。雷塔齊布五千人圍九江。羅澤南三千人攻廣饒。庚辰國藩至南昌。與巡撫陳啟邁籌增船礮。令江西別置水師三營。以道員劉于潯矯捷可任爲將令統之。江西水師自此始。賊由都昌攻饒州。別股由東流建德窺樂平。屯景德鎮。東犯祁門休甯。羅澤南自南昌繞湖東迎剿。內湖水師進駐康山。二月武昌陷。

詔國藩分陸軍赴援。國藩疏言。臣軍現分爲四。陸路兩支。塔齊布駐紮九江。羅澤南分剿廣饒。相去已在六百里外。水路兩支。臣整理內湖水師。駐紮鄱湖。李孟羣回援武漢。屯紮金口。相去更在八百里外。論天下大勢。則武昌據金陵上游。爲古來必爭之地。論行軍常道。則上下皆賊。臣軍坐困中段。決非萬全之策。臣一聞武昌失陷。卽思回剿之計。顧亦有難言者。潯陽據長江腰膂。宜有重兵駐守。一經撤退。則九江南北之賊。肆然無忌。內犯江西。上竄岳鄂。均不可知。其難一賊陷武漢。自金口以下。江面皆爲賊。有內湖水師。不能株守鄱湖。若乘春漲出江。一軍孤懸。上不能



合金口之水軍。下不能剿安慶之賊艇。其難二。湖南用兵已久。庫款空虛。現在金口一軍。口糧不繼。臣再率六七千人前往。江西既難供支。湖南無可籌撥。兵勇積習。久住不戰。口糧尙可展緩。若行役戰陣。則不可一日無餉。其難三。與其千里馳逐。以餉匱致變。不如堅守中段。保全此軍。留備驅策。

詔答以策萬全。不爲遙制。三月。賊陷弋陽。羅澤南攻克之。賊還破興安。陷廣信。澤南至。三日復其城。賊竄玉山。江西軍收復饒州。四月乙巳。國藩移駐南康。癸丑。蕭捷三水師

敗賊馬家堰。追之都昌。焚賊舟百餘。五月。崇通賊陷義甯。以羅澤南往援。己巳。蕭捷三搜賊都昌。甲戌。追賊至鞋山。辛卯。大捷於青山。奪獲賊船甚夥。國藩前失座舟在焉。時巡撫陳啟邁與國藩齟齬。營餉軍火。輒靳不予。國藩疏劾之。

詔褫陳啟邁職。以文俊爲江西巡撫。六月甲辰。塔齊布敗賊新壩。七月。羅澤南至義甯。連破賊於梁口。乾坑。螯頭。雞鳴山。斬馘六千。丙子。蕭捷三敗賊鞋山。丁丑。李元度敗賊段家鋪。戊寅。羅澤南克義甯。庚辰。塔齊布卒於九江軍。塔

齊布初以微弁爲國藩所賞薦擢提督左臂涅忠心報國四字每戰負鎗挾弓矢令二卒樹長矛執曳馬繩竿以從躍馬竦馳瞋人追從從輒反鞭之或單騎偵地勢值賊狙伺追逼從容反戰賊皆卻屢瀕奇險率有天幸賊中驚以爲神性恬退未嘗自伐其能所得祿賜盡以犒賞士卒或深夜呼兵勇絮語家事親如父子所過秋毫無犯民尤感之及死軍民皆哭國藩自南康馳至九江以周鳳山領其軍壬午李元度敗賊蘇官渡甲申蕭捷三攻湖口歿於陣國藩率四百人馳赴青山撫其眾八月羅澤南在義甯上

書國藩謂東南大勢在武昌得武昌乃可控制江皖因單騎詣南康請援武昌國藩令塔齊布舊將彭三元從行合五千人十月澤南軍克蒲圻鼓而北行賊乘虛復入義甯陷新昌十一月己巳陷瑞州庚午陷臨江廣東土匪由湖南陷安福分宜萬載與瑞州賊合陷袁州國藩檄周鳳山解九江圍全軍回南昌時彭玉麐乞假在衡州聞江西急閒關徒步行七百里抵南康國藩令領水師援臨江十二月癸巳周鳳山克樟樹鎮己亥克新淦賊分黨圍吉安知府周玉衡以禦土匪功新擢按察使未上與署知府陳宗

元同登陴守。屢擊賊，敗之。臬司鄧仁堃、白巡撫請以周鳳山援吉安。文俊未許。仁堃用司道公文露移鳳山往援，以固城守心。鳳山終不果行。

文宗以江西危迫。

詔湖南巡撫駱秉章募二千人助之。秉章遣劉長佑、蕭啟江率五千人往。長佑進萍鄉，啟江進萬載，未發而袁州賊輕騎略萍鄉醴陵。守將毛英勃率三百人赴援，力戰死之。萍鄉陷。

六年正月庚申，賊犯樟樹，劉于潯水師擊卻之。辛酉，周鳳山自新淦回援樟樹，遇賊瓦山，敗之。丁卯，彭玉麐攻臨江賊壘，敗之。甲申，賊陷吉安。周玉衡及寮吏死者四十一人。吉安守逾七十日，及城破，論者頗咎周鳳山。湘軍奪氣矣。二月丙午，周鳳山師潰樟樹，賊以數十人追鳳山，大奔不能止。走南昌。國藩回駐省城。鳳山敗，湘軍無大將，乃令李元度自湖口移屯饒州。別遣鄧輔綸與林源恩募平江人號元度所將為楚軍，輔綸所將為江軍。時湖南援軍將劉長佑進攻萍鄉，賊告急袁州，以悍黨千人來赴。賊將黃衣騎馬扼峽口，長佑率百人繞其後，賊棄馬旁走入村屋，擲

火燎之黃衣賊目自投火餘眾奔遂克萍鄉蕭啟江攻萬載敗賊珠樹潭田興恕移軍往助之庚戌賊陷撫州旁擾餘千萬年時江西八府五十餘縣皆陷存者惟南昌廣信饒州贛州南安五郡愚氓多獻糧冊輸錢米賊設偽官治之國藩孤居南昌爲羣賊所絀與湖南隔絕諸軍募死士蠟丸隱語閒行相問答往往爲賊邏獲其不達者十之四五焉三月辛酉彭玉麐移駐吳城乙酉羅澤南卒於武昌軍湖北巡撫胡林翼遣劉騰鴻將四千人援江西以國藩弟國華主軍事由義甯進己巳鄧輔綸林源恩克進賢丁

丑李元度克東鄉撫州賊來爭元度輔綸擊走之庚辰彭玉麐黃虎臣克建昌甲申李元度等攻撫州破賊壘五月戊子李元度鄧輔綸敗賊千金坡丙午劉于濬克豐城劉長佑進軍袁州蕭啟江克萬載五月己巳賊犯吳城彭玉麐擊卻之辛未畢金科敗賊油墩乙亥賊援撫州李元度擊卻之六月丁亥黃虎臣攻建昌輕出遇賊戰死所部軍移屯撫州庚寅饒州陷畢金科還南昌益師攻克之甲辰彭玉麐復南康劉騰鴻曾國華克新昌上高甲寅抵瑞州國藩遣彭山岷李新華等率四千人往迓於是自長沙

湘軍誌 卷四  
東至南昌轉北至九江千里通道如綫七月戊午僞北王  
韋昌輝自臨江援瑞州瑞州故有二城劉騰鴻分兩軍攻  
之比韋酋至我軍已拔南城卽出南城迎擊賊儀從赫奕  
排刀隊尤凶悍騰鴻堅持不動俟其懈乘之殲五百人昌  
輝夜遁入城甲子賊乘雨撲我營吳坤修擊卻之庚午彭  
山吧等軍抵瑞州江楚軍屢破賊城外兵勢稍振而吉安  
建昌等郡邊錢會匪假粵賊名號歛聚千人陷永豐南豐  
新城竄瀘溪廣東土匪犯定安安遠信豐長甯上猶崇義  
雲都省城不能救軍報數月不相聞

朝命廣東閩浙派兵合援八月丁亥邊錢會匪陷貴溪辛  
卯犯河口鎮甲午陷沿山乙未圍廣信知府沈葆楨方督  
餉河口遽還城則居民皆散走葆楨飛書玉山告急於浙  
將饒廷選廷選率二千人先一日至賊見有備圍五日去  
江西州郡見賊至輒委棄聞廣信能守則以爲奇功葆楨  
由是知名湖南援軍將田興恕屯萬載賊自分宜侵上高  
遂攻萬載興恕拒走之蕭啟江攻袁州截吉安賊糧焚其  
舟十一時

特詔起用黃冕爲吉安知府國藩弟國荃在長沙冕就商

防剿策延國荃爲軍主。國荃素負奇略。念國藩急。慨然曰。方吾兄戰利。吾從未至。營相視。今坐困一隅。義當往赴。君但能治餉。吾當自立一軍赴。

國家急。冕請於巡撫駱秉章。檄國荃募三千人。別遣周鳳山領一軍。合六千人。以其始攻吉安。號其軍曰吉字營。九月丁巳。國藩至瑞州。勞師。李元度以撫州圍久。餉益乏。或言崇仁有積穀。宜黃可募民貲數萬金。乃分軍徇略。戊午。復宜黃。癸亥。復崇仁。撫州賊覘我軍他出。撲江軍營。官耿光宣中礮死。益日夜發眾來襲。縱火焚民居。延及營帳。林

源恩仗劍叱奔者。不能止。軍潰死之。元度回軍往援。已無及。聚軍裝焚之。突圍出。圍撫州軍俱潰。元度移屯貴溪。賊復陷崇仁。宜黃。劉長佑擊援賊於袁州。要其鹽舟。沈之。奪餘貨數百車。城賊出救。敗之。十月戊子。曾國華克上高。旋敗賊瑞州。劉騰鴻毀瑞州南城。築新壘二。以五千人守之。賊援絕。乙巳。劉于潯復新淦。戊申。田興恕復分宜。己酉。福建援軍潰於建昌。副將陳上國戰死。十一月甲寅朔。劉長佑蕭啟江克袁州。袁州圍逾八月。賊自相猜貳。有李能通者。詣劉坤一。陣前歸誠。其黨啟西門納軍。俘斬二千。拔出。

脅從二千六百餘人乙丑曾國荃攻安福賊分兩支迎戰以蕭孚泗陳光孚左右拒之國荃當中路陣斬三百餘人丙寅克其城庚午曾國荃敗賊大汾河壬申敗賊千金坡遂進攻吉安時胡林翼克武昌水師進至九江十二月丙戌段起復建昌己丑湖北軍進收瑞昌德安辛卯劉長佑復新喻移袁州屯軍戊之癸巳趙煥聯復永甯辛丑國藩至九江勞師疏言臣由江西省河赴吳城與彭玉麐商酌水師追剿事據諜報十一月底武漢蕪黃次第克復楊載福水師抵九江焚奪賊船殆盡李續賓陸師於初九日進

攻九江府城查外江水師上年正月經臣奏明援剿湖北是時戰船或入內湖或爲風損僅存一百四十餘號駛至武昌今重來九江續添至四百餘號李續賓陸師係上年八月派赴湖北援剿是時羅澤南李續賓所帶湘寶各勇僅五千人今添至八千餘人而都興阿馬隊亦由北岸至小池口臣至九江迎勞諸軍見其軍威嚴肅士氣樸誠諸將聯絡契合愛敬交至雖積勞之後屢勝之餘猶復日夜兢兢衣不解帶不特東三省馬隊忠勇可風卽湘勇與水師亦實不可多得之勁旅惟欠餉積至一百三十餘日請

飭山西陝西迅將月餉三萬兩解至九江專備此軍之用  
至江西各府分駐兵勇五萬餘人舊欠無從補給新歲尤  
難支持再懇飭兩廣月撥四萬兩能多發一日之餉則多  
一日勁卒之用能早克一處之城則早收一處錢糧之用  
詔報可甲辰湖南援軍將劉拔元胡兼善收永甯永新蓮  
花廳上猶辛亥國藩回南昌癸丑李續賓大捷於九江  
七年正月西安將軍福興率浙兵千人至南昌丁巳畢金  
科攻景德鎮死之自楚軍興塔齊布始以勇名天下楚人  
剽悍者率低首而亦豔稱金科材武金科之戰也負鎗腰

五十矢二卒手蛇矛持八尺刀以從怒馬陷陣當者披靡  
常爲他部牽率不得錄其功列將多讒忌之領千人防饒  
州餉不時至歲暮飢困有司者責金科破景德鎮軍食可  
得也乃以乙卯出師入市不見一賊別挈十人至市後賊  
蜂起從卒亡七人傷三人金科縱橫擊刺踐血而出越兩  
日賊以噴筒攻於王家洲隕焉戊午吳坤修普承堯克奉  
新湖北援軍將鮑超敗賊小池口庚午國藩勞師瑞州自  
五年冬瑞臨袁州失陷西路州縣多淪於賊六年秋援軍  
來瑞州兩湖之路始通袁州旣復鄂師抵九江者二萬人



湘軍記 卷四  
西路以次恢復。南昌袁州所屬均無賊。南康四屬邑復其  
三。臨江瑞州吉安九江亦各克數邑。江西軍務駸駸有起  
色矣。二月。國藩遭父憂。逕還湘鄉。國荃吉安之軍。令文翼  
胡林翼遣李續宜來瑞州代國華。國荃吉安之軍。令文翼  
代統。國藩奏以楊載福彭玉麐統水師。責湖北江西供其  
軍。福興至瑞州。上疏請徵兵。頗訾勇營不可用。劉長佑由  
袁州進軍太平墟。以規臨江。蕭啟江屯鸚哥嶺。與瑞州軍  
援應。賊自吉安大舉襲太平墟。列陣二十餘里。官軍駭而  
奔。長佑阻之不得。下馬臥。誓必死。親兵數騎擁之出。卓旗

收軍眾稍集。退屯新喻。袁州三縣民素感長佑。聞敗爭率  
丁壯輦兵米。至者七八千人。潰軍慚奮來歸。軍復振。劉騰  
鴻慮賊侵啟江營。抽瑞州圍師二千。自將救鸚哥嶺。田興  
恕恃勇深入。坐馬中鎗。騰鴻馳救。所殺傷過當。乃畱千七  
百人助啟江。騰鴻還瑞州。三月辛酉。湖北軍將多隆阿克  
殺竈賊壘。丁卯。王國才多隆阿克楓樹坳獨山鎮九江附  
近。惟小池口賊壘獨存。撫建賊竄福建。

詔罷文俊。以耆齡代爲巡撫。四月。駱秉章遣江忠義將千  
人。王鑫將二千人。趨臨江。與劉長佑蕭啟江合軍攻城。不

利黃冕致書鑫乞援吉安卽引軍南渡進吉水破賊水東  
焚其壘五初吉安圍師隸於曾國荃已而劉培元等率千  
人至自袁州趙煥聯率千五百人至自茶陵國荃負地望  
諸將推服雖不相鈐束而進止咸取決之國荃去諸將不  
相下巡撫耆齡奏起國荃仍統吉安軍五月李續賓連敗  
賊九江自官牌夾至白水湖掘濠三十里深二丈廣三丈  
餘賊患之安慶賊以二萬來援水師擊走之閏五月甯都  
賊援吉安與王鑫軍遇於沙溪賊恃眾攻鑫營分伏山林  
間鑫閉壘故不與戰賊飢將退鑫出六百人橫陳馳之則

爭走山隘相擠脅從者伏地待刃賊奪氣狂奔復約萬安  
賊合攻鑫失期不敢進鑫追破之餘眾走樂安崇仁宜黃  
時蕭啟江移屯太平墟劉長佑圍臨江作長濠自固而甯  
都賊猶眾鑫進軍釣峯賊屯溪州連營十餘里然莫敢戰  
逼攻之則爭走擠之水中尸相藉官軍踐之以渡鹵獲不  
可勝計於是土匪與被脅者頗解散鑫名大振賊相稱爲  
虎云時湖南援軍胡兼善誘降賊目復龍泉周鳳山列爲  
己功鳳山驕矜弗戢其下戰輒亂行六月丙寅吉安城賊  
襲鳳山營軍士揚言餉乏皆走趙煥聯等軍從之文翼全

軍退屯安福以誤餉奪黃冕官福興檄鳳山還南昌曾國  
荃自湖南來遂專吉安軍事整兵復進李續賓攻九江城  
垂克賊酋陳玉成率大股來援踞童司牌圍都興阿營蔣  
凝學擊破之七月劉騰鴻克瑞州傷重死之騰鴻之圍瑞  
州也嘗以三百人敗萬眾作長濠困賊賊冒死突圍力戰  
庚寅騰鴻中礮傷明日力疾更戰誓必克礮丸中其脅仆  
地弟騰鶴掖之起激眾曰城不下毋斂我軍士皆泣癸巳  
礮中賊火藥城內火起將士攀堞登開門迎騰鴻尸入城  
治喪聞者咸悲其志謂騰鴻雖死猶能用眾也多隆阿鮑

超敗賊黃蠟山毀其壘四十八八月王鑫卒於樂安軍以  
張運蘭王開化分領其眾鑫初以諸生從曾國藩與羅澤  
南創立湘軍然矜才尙氣不能屈事人治軍嚴肅所至雖  
信宿必築壘浚濠每戰先期集諸將遞說帖相詰難既定  
計則傳示各軍期如約違者雖勝必罰所部號老湘營其  
後提督劉松山以老湘營平捻匪回匪皆守鑫成法京卿  
劉錦棠率師出關勘定回疆立功絕幕老湘營歷二十餘  
年戰績著中外鑫之規模宏遠矣普承堯擊臨江援賊於  
峽江敗績賊日夜填濠夾擊圍軍劉長佑念賊眾五倍我

腹背受敵其勢坐困令圍軍畱三成守濠餘皆裹糧持鎗而進約蕭啟江田興恕會戰軍士望寇旗連十里皆懼長佑誠火鎗及我而後鼓之江忠義李明惠先陷陣遂至賊營賊吹角拒戰盧秀峰繞其後賊大潰燒其壘四十七長佑啟江還圍臨江胡林翼親督軍攻小池口克其偽城九江北岸肅清九月丙戌李續賓合水軍克湖口彭玉麐出江克小孤楊載福克彭澤景德賊合土匪犯貴溪遂趨東鄉襲破周鳳山營殺其軍主帥遠燁遠燁黃梅人早入翰林祖承瀛爲浙江巡撫姦人發其墓遠燁發憤思復仇走

謁曾國藩國藩憂去遂畱軍中以前上封事歷詆政府疆帥非立奇功不足自表異乃募千人自効謂鳳山宿將可倚與合營比寇至鳳山先走新軍隨之潰遠燁一出而軍覆身死論者惜之鳳山三僨軍三奪官賊遂趨進賢復自蔡仁出豐城十月胡林翼奏起曾國藩督師江西欲倚以謀金陵

詔未許十一月石達開由撫饒趨吉安眾號數十萬曾國荃迎擊於吉水三曲灘大破之城圍遂合十二月乙卯劉長佑克臨江楚軍圍臨江久賊飢困謀突出或議長圍截

之長佑曰凡潰圍者其鋒不可遏縱之必自潰乃缺圍分  
兩翼自後驚之賊西走瑞州途中多散亡明年長佑病歸  
所部以劉坤一領之蕭啟江自爲一軍合攻撫州張運蘭  
克建昌於時江西西路惟吉安九江未復

八年正月蕭啟江劉坤一克新淦石達開踞河口鎮率黨  
二萬窺浙江福興退守廣信胡林翼劾福興請以李元度  
防浙邊

詔遣李定泰二月庚戌石達開陷廣豐饒廷選攻克之賊  
退踞洋口辛酉張運蘭王開化克樂安三月庚辰張運蘭  
王開化收宜黃壬午收南豐蕭啟江劉坤一收崇仁甲午  
啟江進軍上頓渡戊戌建昌賊援撫州劉坤一擊破之曾  
國華至九江贊李續賓軍事四月壬子李續賓克九江九  
江圍凡十五日賊酋林啟榮號堅忍能軍食罄則嬰城種  
麥以自給續賓潛於磨盤洲鑿地道張幟築牆佯陳攻城  
具以疑賊三月末東南兩門地雷發城坍啟榮輒堵合之  
續賓益令軍士日夜穴地迤東而南卒轟崩其城賊奔出  
者楊載福彭玉麐水師截於北門俘斬無遺啟榮死亂軍  
中尋出寸磔之於是續賓威名聞天下朝士以續賓前授

浙江布政使爭請赴本任專治浙江軍事胡林翼疏論東征大局先皖北次皖南請以陸路軍事屬之續賓

詔賞續賓巡撫銜以圖皖乙丑蕭啟江劉坤一克撫州丁卯建昌賊出走王開化張運蘭要擊敗之賊走新城曾國荃克吉水萬安時撫建之賊由廣豐犯衢州直陷處州福興統閩浙軍近三萬莫能拒守五月

詔起曾國藩督浙江軍六月召福興還京師劉長佑畱防江西屯建昌七月曾國藩由武昌歷九江以達南昌援浙諸軍俱集於河口鎮八月浙江賊由福建邵武出瀘溪劉

長佑迎戰不利遂陷金谿安仁張運蘭躡之收安仁賊略新城東走長佑北擊賊金谿大破之賊悉竄福建邊時吉安圍守經年賊酋李雅鳳翟明海將悉眾趨邵武曾國荃乃作浮橋水陸合攻賊結木牌順流衝橋屢斷屢續之盡毀其牌筏賊懼益相猜李雅鳳殺翟明海其黨夜出城乘舟遁國荃率水師追擊丁巳克吉安生擒李雅鳳於是江西列城皆復閩賊回竄新城劉長佑擊走之九月曾國藩至建昌國荃率師從之十月劉長佑屯撫州軍疾疫死者大半乃遣還湖南張運蘭進軍邵武賊復還江西南掠信

豐北犯景德李續賓覆軍三河湖廣總督官文奏國藩移師援皖十一月賊自信豐犯南安窺贛州國藩遣蕭啟江援贛南張運蘭吳國佐攻景德時國荃回湘以其部將朱品隆爲親軍隨國藩十二月庚申吳國佐約張運蘭會擊運蘭失期戰不利國佐故與運蘭不相下上書求退罷其軍戊辰運蘭擊賊景德敗之劉騰鶴自吉安移屯九江以應湖北

九年正月己丑蕭啟江攻南安新城墟賊壘克之乙未連克池江小溪鳳凰城長江墟賊壘丙申克崇義庚子張運蘭攻景德鎮敗績二月甲辰蕭啟江克南安南安故有二城夾水賊分屯相倚軍至皆棄而走啟江約軍屯城外作壘自固不許入城已而偵賊勢弱遂攻南城賊敗退啟江直驅之城賊跳乘勝攻信豐賊悉眾趨湖南郴桂所謂石達開三十萬眾圍寶慶者也安徽賊自婺源竄建德窺彭澤劉騰鶴敗之玉虹橋己巳進攻建德礮中火藥騰鶴死之國藩移駐撫州增遣撫州屯將屈蟠戍湖口以張岳齡凌蔭廷爲營官募三千五百人隸朱品隆調玉山防軍助攻景德而檄蕭啟江還援湖南三月癸未張運蘭敗賊景

德鎮四月丁卯曾國荃至撫州軍五月國荃率朱品隆等軍五千八百人助運蘭攻景德時諸軍與賊相持七月水陸二萬人莫肯先進國荃至乃令移營敗援賊於浮梁南三戰皆捷賊糧垂盡六月大雨水漲劉于濬等水師逼西瓜洲壬子國荃進中路運蘭居左王文瑞居右火延燒市房賊乘夜潛遁浮梁遂克景德鎮國荃等追之癸丑克浮梁賊竄建德祁門江西肅清乃遣張運蘭援寶慶國藩帥諸軍出九江八月至黃州九月議合湖北軍攻安慶十月國荃率吉字營至巴河

王定安曰曾文正以客軍羈江西外逼石達開韋昌輝諸劇寇內與地方官相牴牾其艱危窘辱殆非人所堪部將官至三四品者每爲州縣扑責嘗檄舉人彭壽頤領一軍巡撫怒收繫之獄其餉糈不時至募民捐貲給軍所給印收州縣輒指爲僞拘訊捐戶詬厲之已甚故事欽差大臣頒關防其他督辦軍務雖號欽差無銅符但自刊木印以爲信諸疆帥故詰公所刊關防或謬題欽差大臣乃移文正其名以相譖然公包羞忍詢卒歲大功者恃

聖主特達之知有以弭猜忌者之微耳公之言曰今日局



勢非位任督撫有察吏之權者不能治軍籌餉其後  
朝廷命將必畀以封疆數年間成效昭著羣賊以次蕩平  
其議自公倡之也嗟乎六合一家而疆臣私其財力不相  
恤如列國然爲將帥者處客寄虛懸之位而欲有所成就  
豈不難哉

湘軍記卷四

武昌范德培校字

湘軍記卷五

東湖王定安撰

援守江西下篇

咸豐十年春和春金陵師潰蘇浙大擾賊悉眾東趨江西  
稍息肩曾國藩總制兩江有

詔詢左宗棠能否治兵因力薦之擢宗棠四品京堂襄辦  
軍務五月國藩進軍祁門徇皖南以圍攻安慶之師屬弟  
國荃議令宗棠駐江皖之交防廣饒以規浙九月宗棠募  
湘勇五千次樂平十月駐景德鎮聞貴溪有賊馳擊敗之

廣東匪犯信豐南豐建昌連陷河口興安德興婺源十一月庚寅朔宗棠克德興壬辰克婺源匪併入徽州宗棠雖躋京卿軍事皆秉國藩指揮比於列將國藩以左軍新造慮未任戰遇急則令鮑超爲之援宗棠佐湖南軍幕十年諳韜略或疑行陣非所習而超領霆軍有聲慄急素爲賊所畏宗棠初起亦假超威名以爲輔時安慶圍亟羣賊欲牽我兵勢則遣黨出江西冀分皖軍以赴之僞堵王黃文金者梟悍耐戰賊中所稱黃老虎者也自建德率大股犯饒州己亥陷彭澤辛丑陷浮梁壬寅陷都昌鄱陽江西大

震宗棠在婺源規取徽州聞急回軍景德而賊已偏我軍營於馬鞍山宗棠擊之里市渡敗之賊越山遁遂復浮梁甲寅黃文金自將悍黨二萬由湖口鄱陽犯景德宗棠會鮑超軍擊走之賊退踞石門洋塘左鮑軍躡至值雨雪相持未能戰十二月楊載福水師克彭澤都昌鄱陽而賊之圍湖口者彭玉麐吳坤修水陸固守得無恙

十一年正月左宗棠進屯梅源橋鮑超軍扼洋塘賊築壘延二十里乘雨雪潛渡謝家灘夜結浮橋三襲超軍宗棠遣羅近秋護其營戊戌超率所部出擊陳由立等攻中路

黃慶等攻左陳得勝等攻右而以馬伍承彌縫賊自雞公坡渡河撲超營羅近秋擊卻之超麾軍扼謝家灘拒戰直薄浮橋賊潰奪橋走溺斃無算斬級四千盡毀其壘黃文金負創宵遁己亥超躡之彭澤下峒坂宗棠軍躡之黃麥鋪賊復率青陽銅陵援賊踞建德聲言回犯景德鎮癸丑超遣陳大富徇建德綴賊軍自率大隊攻黃麥鋪賊乘我未成列漫山分布呼聲振林壑超覘陣動乘勢壓之賊大奔追至建德適陳大富會水師克其城賊走安慶饒九解嚴而偽忠王李秀成自玉山犯廣信不克圍建昌穴地攻

城城兵不滿千劉于溇援師敗績走撫州賊躡至撫州圍攻復不克乃竄吉水永豐二月偽侍王李世賢由婺源犯樂平宗棠戰於甲路不利賊踞湧山沿溝宗棠擊敗之遂全師回景德曾國藩以羣賊注江西延綿近二百里遣陳大富移防景德宗棠率軍趨鄱陽戊子景德陷大富死之宗棠駐金魚橋賊三面環集後路斷三月己卯朔移駐樂平李世賢偵知留黨守景德自將趨樂平癸巳至桃嶺甲午宗棠遇於馬家橋縱擊敗之丙申復敗之桃嶺戊戌追至龍珠羅近秋陣歿宗棠度賊必薄樂平城城久坍塌乃

州軍言 卷五  
傍城東南掘外濠十餘里引水塞堰以陷賊騎令鄉團入  
城守爲疑兵辛丑賊逼城而陣縱橫十餘里旌旗蔽山谷  
宗棠軍益暇憑濠植立無譁待其偏擊之發輒中相持至  
夜賊益疲壬寅賊大舉犯西城宗棠率劉典趨中路王開  
化出南門趨西路王開琳趨右路將士躍濠大呼賊駭而  
奔追至高橋小溪人馬相蹈藉李世賢易裝遁左軍由是  
知名

詔擢宗棠三品京堂改幫辦軍務李秀成陷吉安江西軍  
復之乃陷踞瑞州四月秀成遣黨分擾武甯義甯奉新靖  
安入湖北邊李世賢犯廣信宗棠追擊破之世賢走浙江  
陷金華慈谿時安慶援賊踞集賢關國藩檄鮑超渡江赴  
援江西惟存左軍七千池州賊陷建德踞鄱陽規田街宗  
棠在廣信聞警冒雨遄返五月甲午至景德鎮賊夜遁左  
軍追及於桃嶺敗之己酉克建德而浙撫王有齡等奏請  
宗棠援浙

文宗垂問國藩覆言皖南事急宜保徽州固廣饒爲根本  
宗棠兵少難兼顧

詔可之癸丑宗棠敗賊白沙關六月李秀成遣黨分擾德

安建昌前鋒及生米鎮萬壽宮。南昌戒嚴。聞賊與花旗廣匪先後竄廣信。蔓延雙港河口湖坊鉛山間。國藩念江西急。遣鮑超赴援。七月己丑。超抵九江。賊素懼霆軍威。德安建昌賊皆不戰而走。超反以不及賊爲憾。李秀成在瑞州。聞超至。則令奉新靖安安義諸賊悉由臨江渡河。分踞樟樹沙湖豐城。己酉。超馳至豐城。隔水而軍。賊於樟樹結浮橋。渡師拒我。次日。賊大股列山岡。搖旗迎戰。超麾軍分四路乘之。羣賊見鮑超旗。則膽落交鋒。卽潰。追及於白馬寨小塘墟。復破之。賊另股圍撫州。八月庚申。超至撫州圍解。

走許灣。國藩聞霆軍捷。江西事緩。檄超回援安慶。比至南昌。武陽渡。曾國荃已克安慶。超復折而南。庚午。至瑞州。賊早竄貴溪雙港湖坊河口。與花旗廣匪合。號二十萬。辛未。超自瑞州冒雨遄行。丙子。抵貴溪。賊遁。戊寅。進軍雙港。始與李秀成遇。賊潮湧而至。超分軍應之。鏖戰三時。賊終不支。越山跳。輒墜巖澗。死者萬人。毀雙港九思巖同田河田湖坊賊壘七十餘。次日。進攻鉛山。復大破之。克其城。追至廣信。賊解圍遁。

文宗以超盛暑鏖戰。頒珍物優異之。李秀成旣入浙。李世

賢與之合。浙事益糜爛。杭州危急。朝士交疏論以曾國藩兼督浙軍。國藩薦左宗棠專浙江兵事。奏以饒州廣信徽州三府屬邑丁糧銀米給宗棠。饒設婺源景德河口三稅局。裨之三府防軍。悉隸宗棠。於是江西又爲浙餉根本所系矣。十二月。杭州陷。

詔授宗棠浙江巡撫。自廣信移駐徽州。鮑超移勦甯國以援浙。

同治元年正月。

召毓科回京。沈葆楨爲江西巡撫。葆楨前守廣信有名。授

吉南贛臨道。不悅於長官。告養歸閩。曾國藩屢疏薦其才。穆宗新卽位。尤嚮用國藩。所論薦輒大任。故超擢葆楨撫江西。軍興來。道員逕躋巡撫者。李鴻章曾璧光與葆楨而三。葆楨勛績不逮鴻章遠甚。而負清望。爲世所推許。亦一時之良也。江西巡撫。自陳啟邁文俊者。齡暉光宸毓科皆守承平制。委權司道。其禦大寇。皆倚客軍。葆楨素習湘人。始自養兵。重用湘將。道員王德榜段起以偏師積闕。閱爲大將。葆楨倚任之。其後江忠義席寶田留防江西。始稱勁旅。而寶田名尤重於他將。葆楨之初至也。率千人赴廣信。

閱邊防國藩飛書止之且以吏事餉事相屬葆楨已遣發  
遽返南昌頗慙懣國藩方恃江西爲餉源月撥漕折五萬  
給徽甯防軍關稅三萬償逋餉而釐金歲輸百餘萬皆給  
東征九月葆楨以本省防軍需餉截留漕折月四萬兩時  
江南疾疫大作李秀成率數十萬眾援金陵軍勢阡危逋  
欠日積國藩以是頗怨葆楨矣

二年二月黃文金自皖南犯江西分擾鄱陽浮梁都昌左  
軍及江西防軍拒卻之乃西趨湖口踞文橋梧桐嶺太平  
關五月李榕自彭澤移屯湖口三里街江忠義自九江東  
渡屯堅山以逼之六月賊自文橋犯堅山營江忠義迎擊  
走之黃文金中鎗傷閉壘不出甲辰忠義會浙江援軍劉  
典席寶田顧雲彩屈蟠敗賊青山斬馘二千屈蟠復敗賊  
段家洲七月丁未夜忠義自堅山俯瞰文橋七壘火熒熒  
相續知賊將遁約李榕平旦要擊賊不虞我軍至皆潰奔  
毀其壘三追至建德援賊大至復擊走之時金陵事亟國  
藩奏徵忠義軍出湖口轉戰青陽忠義病歿葆楨悉留所  
部屯江西奏以九江洋稅專供江席兩軍會國藩徵餉九  
江關道蔡錦青分稅銀萬五千以應乃報巡撫葆楨大怒

謾詞詆錦青移文詰問國藩國藩遂詞謝之然已積不相能矣十月李鴻章克蘇州李秀成先期遁回金陵曾國荃圍師益眾賊糧垂罄秀成涕泣說洪酋棄城走江西就食不從十二月秀成偵溧陽至饒景數百里頗乏食乃留防守而陰嗾李世賢持二十日糧道長興廣德甯國以犯江西先據腴區待秀成於是世賢遣黨西竄行甚慄疾國藩檄毛有銘渡江屯休甯葆楨以席寶田等萬人屯婺源韓進春五千人屯玉山拒之

三年正月辛亥席寶田攻賊金谿甲寅復其城賊由瀘溪趨建昌江西防軍敗之萬年橋庚申賊犯建昌席寶田韓進春迎擊敗之王戊寶田敗賊婺源之規橋乙丑進春敗賊玉山之洋口二月左宗棠軍克杭州偽聽王陳炳文偽康王汪海洋自浙逸走分道犯徽州三月毛有銘唐義訓迎戰於楊村敗績於是嶺內遍地皆賊率由龍灣婺源竄江西絡繹望於道章貢間騷然矣葆楨以江西軍事方殷奏留茶稅牙釐專供本省軍部議允之國藩所部月餉需五十萬兩度支裕時歲給兵才六成至是金陵圍師益增餉入益絀歲給才四成欠餉至十六七月軍士缺望國藩



因抗疏曰臣初任江督兼辦皖南軍務其時江南六府糜爛皖南僅存祁門一縣於是奏辦江西釐金以充東征諸軍之餉月撥漕折五萬洋稅三萬先後奉

旨允準沈葆楨到任後歷停漕折洋稅臣均未具疏爭辯今臣軍發餉四成江西各軍發餉八成以上臣軍欠餉十六七月江西軍欠餉不及五月以民困而論皖南甯國各屬市人肉相食或數十里野無畊種村無炊煙江西亦尙不至此臣於三省皆係轄境非敢厚於皖吳而薄於江西無論何人處臣之地勢不得不出於此也今蘇浙之省會

已克金陵之長圍已成論者輒謂大功可成元惡可斃以臣觀之洪酋與忠逆堅悍異常克復之遲速尙難預計昔庚申之春和春張國樑功敗垂成彼時圍師多二萬人餉項存營者尙數十萬今則餉需奇絀朝不謀夕安得不爭江西之釐以慰軍士之心臣嘗細繹會典事例大抵吏事應由撫臣主政兵事應由督臣主政就江西餉項論之丁漕應歸沈葆楨主政以其與吏事相附麗也釐金應歸臣處主政以其與兵事相附麗也釐金之起始於咸豐三年雷以誠倡辦於揚州初非

國家經制之款。臣本督兩江。又縮兵符。凡江西土地所出之財。卽丁漕洋稅三者。一一提用。亦不爲過。何況釐金奏定之款。尤爲分內應籌之餉。不得目爲協餉。亦不得稱爲隔省代謀。如江西以臣爲代謀之客。則何處是臣籌餉之地。謂安徽應籌耶。則喬松年亦得執本省隔省之說以相拒。謂江南蘇松各屬應籌耶。則李鴻章兵數之多。亞於臣處。除月解四萬外。勢難再行提用。謂江北淮揚各屬應籌耶。則裹下河蕞爾之區。臣與吳棠富明阿馮子材四人。爭剝競取。其何能給。臣聞同僚交際之道。曰分。曰情。巡撫應

歸總督節制。見諸會典。載諸坐名。

敕書。沈葆楨不得而違分也。軍事危急之際。同寅患難相卹。有無相濟情也。沈葆楨於前年漕折。上年洋稅。今年釐金。三事中。豈無一事可以先商後奏者。人恒苦不自知。或明於責沈葆楨。而闇於自責。臣例可節制江西。或因此而生挾權之咎。臣曾保奏沈葆楨數次。或因此而生市德之咎。幾微不慎。動成仇隙。然臣閱世已深。素以挾權市德爲可羞。頗能虛心檢點。卽如漕折一案。臣曾函商一次。咨商一次。洋稅一案。臣接撫臣峻詞詰問之咨。曾經密函婉復。

沈葆楨專尚客氣不顧情理實有令人難堪者臣亦不復能隱忍不言矣應請

諭飭江西釐金仍全歸臣處經收以竟將蕝之功俟金陵克復分成勻濟其金陵未克以前除彭玉麐劉于濬孫昌國三軍需餉五萬有奇循舊仍由江西釐金供支外其江席兩軍萬人臣亦必分撥特不可遽改局面搖動軍心致生功虧一簣之變於時葆楨上疏求罷

詔和解之乃分釐金之半撥金陵皖南大營餘供本省餉而另提輪船經費銀五十萬給金陵軍四月李鴻章克常州餘賊亦道徽州走江西時汪海洋等踞貴溪金谿瀘溪而廣昌賊北犯南豐與相應李世賢屯崇仁北踞東鄉東併宜黃

朝廷益憂江西

詔詢國藩於彭玉麐楊岳斌中擇一人鎮撫岳斌載福易名也國藩以江西數被寇遣軍則破走之未嘗注意左宗棠夙重岳斌特疏請令當一面

詔岳斌督江西皖南軍先是浙中報賊逸出者殘眾數千人而席寶田上言強寇八九萬國藩葆楨據以上聞岳斌

以寶田語侵宗棠滋不悅當是時諸軍分部攻守江忠朝  
席寶田攻崇仁王文瑞自樂安北進鮑超自豐城南下期  
會兵崇仁城下王沐自撫州攻金谿至許灣遇伏敗績賊圍  
撫州王德榜王開琳等屯安仁以規東鄉周寬世屯進賢  
衛省城水師孫昌國屯弋陽劉于濬屯盱水自江西用兵  
以來設備之盛未嘗有也岳斌至則議增兵八千以餉乏  
未果行六月周寬世王德榜會師圍東鄉賊自南豐援崇  
仁劉典席寶田合擊敗之賊勢西趨王沐移屯豐城東界  
王文瑞移永豐丙戌鮑超遇南豐援賊於豐城東敗之是

月曾國荃克金陵偽幼王洪福填越城缺走廣德七月己  
亥朔鮑超營七里岡以規許灣壬寅鳴角直進羣賊拒戰  
不及前鋒逼壘門軍士以草填濠悉奪雙鳳嶺琉璃岡九  
子嶺村神嶺賊壘毀平之賊自赤橋許坊來援復大破之  
環許灣賊壘皆盡斬馘近四萬遂進攻金谿己酉克之東  
鄉賊將率六萬眾詣超降選洋鎗精兵七千隸其軍庚戌  
江忠朝席寶田克崇仁辛亥克宜黃壬子宜黃賊走南豐  
超進屯建昌乙卯超軍收新城丁巳收南豐賊走廣昌南  
圍甯都知州郭毓龍城守賊走雩都王文瑞軍乘之賊走

信豐犯南安不得入。悉黨踞瑞金。超息兵南昌。岳斌進駐甯都。悉徵水陸軍會勦。席寶田慮浙防空虛。疑不進。岳斌奏以違節制。奪按察使。降知府。尋有

詔岳斌總督陝甘。促赴鎮。江西軍事專於巡撫。八月賊酋黃文金等挾洪福瑱走浙江。左軍部將劉光明黃少春禦之。淳安昌化境屢破之。黃文金譚體元皆殛。偽裕王李繼達挾福瑱走徽歙邊。道建口趨績溪。其眾多降。乃由遂安走開化。入廣信。黃少春先扼廣信。劉典屯貴溪。賊走鉛山。將循建邵邊。合瑞金踞賊丁太陽。丁太陽亦東北趨石城。

道謀迎福瑱。張岳霖王德榜等軍邀之。賊疾走瀘溪。斜趨山谷間。晝夜行。諸將聞福瑱在。偵所嚮爭躡之。九月席寶田邀賊新田不及。遂率輕兵裹糧行。三日夜及之。廣昌賊約三千人。憑嶺殊死鬪。官軍踴躍赴擊。大破之。殘賊才千餘。擁福瑱南走。寶田度賊一日未食。必止餐。令軍士蓐食追之。已酉平旦。及石城。見炊煙。令繞旁山先設伏。乃陣賊見官軍。遽走入伏中。俘斬過半。於是生得洪仁玕。洪仁政。黃文英及福瑱未昏妻。而福瑱走免。賊悉散。無可蹤跡。癸丑。鮑超兵至瑞金。丁太陽南奔武平。辛酉。寶田部將周家

長聞所俘小兒牧馬者語其曹曰小天王過此矣卽跡之  
福瑱乃反從數小兒北走荒谷中擒而訊之諸俘者皆曰  
是矣並獲李秀成子其祥事聞

詔洪福瑱么魔小醜不直檻送京師磔之南昌市李其祥  
俟及歲時照例治之餘黨汪海洋等入福建諸軍移援閩  
論功左宗棠封一等伯沈葆楨賞一等輕車都尉鮑超封  
一等子浙江布政使蔣益澧賞騎都尉記名按察使席寶  
田賞雲騎尉部裨給獎有差明年霆軍援甘肅超假還蜀  
其部憚西征行次湖北金口大譁四月還掠袁州五月叛  
卒走廣東合汪海洋侵犯江西邊席寶田擊破之超復自  
蜀來招叛軍入粵江西平

王定安曰曾文正沈文肅世皆號爲君子曾公尤恢廓有  
容常以忍辱包羞誨其門人子弟然爭餉一疏語稍傷於  
激矣其必有憂危迫切發於不得已者乎沈公權勢遠出  
曾公下舍江西則無可籌之餉其畫疆而守聊固吾圉世  
多諒之然悻悻負氣亦過矣嗟乎位敵則相猜權均則相  
逼賢者不免況其下焉者乎

湘軍記卷五

東湖黃學濂校字

湘軍記卷六

東湖王定安撰

規復安徽篇

嗚呼軍興以來東南之亂極矣然未有甚於安徽受禍之  
 烈者也其南則池州太平毘連金陵偏於賊巢而徽甯二  
 郡錯處江西浙江間賊往來皆蹂躪之北則和滁與金陵  
 隔江而峙鳳陽廬泗潁亳壽諸州介乎徐豫之交民俗勁  
 悍好鬪樂禍李兆受苗沛霖之倫乘機號召結圩寨竊名  
 城自爲君長雄據一方而安慶扼長江腰膂俯仰吳楚爲

兵家所必爭。賊既陷州郡，設偽官，責糧賦於民，民之擄殺流亡，死喪以百萬計。隴畝荒穢，百里不聞雞犬，其僅存者，築垣自守，幾望官軍不至，閒餽遺賊，冀苟免於旦夕。甚至仇讐相圖，弱肉強食，自相誅夷，殘滅者不可勝數也。迨湘軍起，曾國藩、胡林翼經營東征，尤急急以謀皖爲事，賊苦圍攻，久則旁掠湖北、江西，以疲我。我軍崎嶇角戰，屢瀕於危。自曾國荃克安慶，悍酋陳玉成就戮，羣賊奪氣，而淮南北，奸宄反側之徒，始爭輸誠言款事矣。初咸豐三年正月，洪秀全棄武昌東下，總督陸建瀛師潰鄖穴，按察使張熙宇、水軍屯小孤山，聞警亦走。壬戌，安慶陷，巡撫蔣文慶死之。布政使李本仁走舒城。

詔逮治熙宇、本仁，賊眾號五十萬，棄安慶不守。水陸趨金陵。二月乙酉，江甯陷。洪秀全與楊秀清定議踞之，遣林鳳祥等陷鎮江、揚州。四月，胡以晄犯桐城，再陷安慶。林鳳祥略滁州，徇臨淮。乙未，陷鳳陽。五月，楊秀清復遣吉文光自浦口西北犯亳州，與鳳祥合犯河南歸德，中原騷然矣。賊既踞安慶，僞翼王石達開頗事要結，張榜安民，擇村里桀黠者爲鄉官，迫民獻糧冊，按畝輸錢米，立權關於大星橋。



以鐵鎖巨筏橫截江面阻行舟徵其稅時院司皆僑寄廬州眾議建爲省治十月楊秀清以秦日綱代達開日綱尤凶狡乙酉乘雨撲集賢關進攻桐城陷之庚子陷舒城團練大臣呂賢基等死之總兵恆興走廬州

詔斬以徇授江忠源安徽巡撫忠源新自江西援湖北力疾趨廬州奏以曾國藩練軍六千人助剿十一月宋晉復言國藩負時望人樂爲用應令順流東與忠源水陸夾擊詔國藩率舟師出洞庭入大江規復安慶國藩因建四省合防之議

文宗手詔答曰安省待援甚急若必偏執已見則太覺遲緩觀汝奏直以數省軍務一身克當試問汝之才力能乎否乎汝能自擔重任迥非畏蕙者比言旣出諸汝口必須盡如所言辦與朕看時黃州以下皆賊援師不能達皖境而湖南前遣劉長佑江忠濬湘滇兵已三千餘江忠源自鄂率千人饋兩行將率多道病忠源亦病至六安憊甚六安吏民遮留不許以鶴麗鎮總兵音德布守六安昇疾達廬州所部才數百人忠源旣入城胡以晄率悍黨十餘萬踵至圍之數匝忠源策水西門當賊衝自率親軍駐之廬

民登陴環守者萬人。賊穴東門爲隧道，忠源募死士自穴出迎擊，斬其酋。賊驚躁，我軍自城上擲火彈擊之，皆反奔。賊復穴水西門，火發，城崩數丈。忠源手大旗緣陴上，堵合之。當是時，援軍壁廬州者，總兵玉山率滁兵駐拱宸門，陝甘總督舒興阿率萬五千人駐岡子集，總兵音德布率滇兵駐棗林，江忠濬劉長佑自湖南至，駐西平門五里墩。玉山戰死，舒興阿音德布屢戰皆挫。廬州益飢困，長佑忠濬遣卒挾白鏹油燭，夜半縋城入，以濟軍。鄂將戴文蘭以五十八人閒行至廬，懷鏹入城，而賊步騎十倍我，援師中隔。

不能進，圍月餘。益穴地埋火藥爲地雷。十二月丙戌夜，水西門城坍，賊緣牆上。忠源揮兵搏戰，天且明，霧蔽蔽如雨，左右血刃擁巡撫行。忠源手劍自刎，不殊，有健兒負之走，嚙其項，脫身投古塘死。同時殉者，布政使劉裕鈔、李本仁、池州知府陳源、充等。事聞，贈忠源總督，湖南江西廬州皆建祠。忠源字岷樵，少以俠聞，嘗赴禮部試，其師鄧某死京邸，友人鄒生曾生卧病，朝夕在視，及卒，忠源謀歸三喪，走萬里反葬其閩，人皆義之。與湘陰郭嵩燾友善，在京時嘗偕詣曾國藩，詼諧縱談，國藩大奇之。既出國藩，目送之曰：

岷樵天下奇才他日必立勛名然當以節義死時承平久聞者或駭怪至是竟如其言忠源旣薨

詔提督和春漕運總督福濟規廬州旋授福濟安徽巡撫駐軍店埠

四年正月

詔會國藩出九江謀安慶與和春福濟南北會師戊辰國藩水師發衡州而賊已大舉趨湖北前鋒及岳州

文宗促國藩兼程援鄂語在規復湖北篇二月賊將孫寅三越太平陷祁門復南陷太平踞之學政孫銘恩自剄死

曾立昌率皖賊犯豐工渡河竄山東是爲臨清股匪福濟和春駐廬數月久不得要領五月庚戌冒雨攻城斬千餘級辛亥再戰再勝之城卒弗克總兵全玉貴中礮死軍心益懈巡撫建議以重兵扼東北路別遣將督團練巡郡邑以爲聲援於是民間多築堡練兵圩寨自此興矣七月江南軍張國樑克太平閏七月知州李元善克英山八月湘軍克武昌羣賊還走皖境九月福濟軍復廬江十一月曾國藩督師九江石達開在安慶遣黨分屯孔壠驛小池口以援九江塔齊布羅澤南連敗之十二月福濟軍克含山

五年正月楊霈師潰廣濟皖賊由富池口道斬黃逕犯武漢曾國藩自九江遣軍援鄂南岸之賊自東流建德犯江西饒州復東掠祁門休甯攻徽州陷之是時石達開羅大綱踞九江湖口與安慶首尾相救自湖口下東流建德暨徽州甯國賊往來規犯江西浙江者相望於道而廬州陷賊已二年和春福濟駐軍三里岡曾國藩崎嶇江西未遑攻皖二月國藩上議曰以湖北安徽江西三省論之陸路須有勁兵四枝水路須有勁兵兩枝自蘄黃以達太湖宿松爲內一路自漢口濱江而下田鎮鄔穴以達小池口望

江縣爲外一路南岸自九江以上興國武甯崇通皆土匪句結粵賊之淵藪爲西一路自湖口下饒池徽甯皆逆匪覬覦浙江之要途爲東一路北岸之黃梅太湖前臨大江後枕潛岳一山綿亘數縣屏蔽舒廬爲該逆必爭之地南岸池州雖瘠區而大通鎮殷家匯水陸交衝南窺徽嚴東障蕪湖亦爲該逆必爭之地故南岸以東一路爲最要而西路次之北岸以內一路爲最要而濱江一路次之水師自武昌以達湖口爲上一枝自小孤山逾東西梁山以達太平采石爲下一枝乃與紅單船相接兩枝各自成軍庶

免首尾不顧腹背受敵之患。論中原之大勢，則江北重於江南。論此賊力爭長江，堅守廬州之情，縱不能籌備兩軍，亦必須梅太舒、桐有一枝，堅強可恃之兵。然後內可克廬郡，外可清江面。副都御史袁甲三現駐臨淮，由壽州光固以達麻城黃州，程途不過十日。若令招壽州光固之勇，練成五千勁旅，由麻城出黃州之背，出其不意，邀而擊之，則蕲黃各屬可復。皖鄂之氣可通，疏入未果行。三月，浙江巡撫何桂清遣軍復徽州及歙縣休甯，賊由黟縣入婺源。向榮遣鄧紹良自浙赴援，克之。賊復走黟縣石埭，鄧紹良追

擊敗之。五月，鄧紹良克石埭。六月，張國樑復太平。七月，鄧紹良復蕪湖。十月辛卯朔，福濟和春克廬州。十二月，安慶賊合無為蕪湖諸寇東解，鎮江圍。江南水師李德麟、吳全美逆擊於神塘河，大敗之。而裕溪口援賊由范羅山連亘陶陽浦，亦為向榮軍所殲，斬其酋數十。

六年正月，和春復舒城。鄭魁士敗賊三河。三月，賊由太平涇縣犯甯國，陷之。向榮遣軍援甯國。五月，江南大營陷。七月，向榮薨。和春為欽差大臣，自廬州移師金陵。八月，金陵賊酋相殺。石達開奔甯國，還入安慶。九月，知府李元華克

無爲福濟軍復巢縣秦定三敗賊桐城十一月胡林翼克武昌十二月楚師圍九江軍鋒所至羣酋股栗皖邊皆震懾矣

七年二月賊圍壽州金光筭擊走之浙軍周天受復婺源鄭魁士師潰桐城

詔湖北撥兵援皖官文遣李孟羣率二千五百人以行三月楚軍大捷於小池口四月李孟羣復英山賊酋陳玉成自桐城率三萬眾犯鄂邊楚軍李續賓駐小池口鮑超屯黃梅以禦之時官文胡林翼專力攻九江議者輒欲分兵

援皖林翼等奏昔吳臣紀陟言長江五千七百餘里疆界雖遙而險要必爭之地不過數四所謂險要者荆襄武漢九江湖口耳今上游悉定必盡力攻克九江而後江西之門戶以固江南之全局可圖後卒如所策閏五月皖賊大舉犯湖北胡林翼至黃州督師七月李續宜擊賊蘄黃大破之八月楚軍克小池口賊全股回皖合捻犯廬州九月福濟遣軍逆擊敗之時楚軍楊載福水師克湖口彭澤乘勝東下破馬當峽焚華陽鎮辛丑克望江癸卯克東流遂趨安慶燬西門外賊壘三甲辰克樅陽乙巳破大通鎮丁

未克銅陵。浹旬之內，轉戰千里，遂與江南水師李德麟相接。先是德麟率紅單船屯繁昌之舊縣峽口，阻賊艇弗得上。已七閱月，至是驟見楚軍幟，皆驚爲神。載福進攻泥汊，賊壘克之，乃罄所獲糧米船礮餉紅單船，曰：微公等扼吭，吾不能飛渡也。德麟軍士皆歡呼。十月，載福回軍彭澤。十一月，江西賊大舉犯湖口，援九江。皖賊亦自江北岸應之，麇集宿松太湖間。官文以湖口屬楊載福，寓書都興阿、徇陸路，遣多隆阿、鮑超等破賊太湖，斬四千級。唐訓方破賊陳德園，而楊載福攻湖口，李續宜率陸軍五千會彭玉麐。

水師三路擣之，皆大捷，斃賊二萬餘。賊走霍山，踞獨山西河口，將犯羅田麻城。官文分九江步軍三千禦之。

八年正月，楚軍石清吉等助防宿松，多隆阿敗賊太湖。二月，羅田知縣崔蘭馨復英山，唐訓方敗賊黃泥阪。四月，李續賓克九江。皖賊由英霍繞商城，陷黃安。五月丙子，李續賓攻克之。戊寅，復麻城，乘勝追至商城，暨皖之潛、太、英、霍，屢敗之。江南軍克江浦，皖賊踞來安，冀爲金陵聲援。和春遣軍復之。揚州軍復全椒。七月，三河賊陷廬州。先是文宗以福濟師老無功，召罷回京，翁同書爲安徽巡撫，勝

保爲欽差大臣。同書尙在揚防。李孟羣攝巡撫事。駐兵店埠。廬城駐守者。惟總兵蕭開甲。知府武成功。戊子。賊乘虛攻城。陷之。賊偵勝保且至。遣黨至定遠迎戰。穆騰阿克蒙額等擊走之。巡撫兵新敗。器械失。告急於李續賓。約繞豫赴廬。續賓方血戰太湖。未能分軍。丁巳。續賓克太湖。癸亥。克潛山。丁卯。多隆阿鮑超克石牌。九月。李續賓自石牌徇桐城。趙克彰爲前鋒。賊出城撲我營。迎擊破之。毀其壘四。已卯。李續燾肉薄先登。遂克桐城。續賓移兵舒城。賊聞桐城拔。無固志。庚寅。棄舒城走三河。三河距廬州五十里。賊

屯糧械以濟廬州。金陵者也。築大城環以九壘。賊守甚嚴。續賓入皖才一月。軍行迅厲。城壘望風瓦解。已克四邑。皆留兵守之。是時都興阿馬隊攻安慶。多隆阿鮑超陸師趨集賢關。楊載福水師擣北門。皆絙賊不能進。而羣寇新破。江北德興阿軍陷六合。殺翼長溫紹原。勝保屯定遠。日夕待援。

朝廷憂皇。專恃續賓軍。勝保屢劾續賓赴援稽緩。

密詔促之。凡十日七奉。

旨。續賓益自奮。諸將爭言安慶未復。軍行無後繼。腹背受



敵此危道也。宜還桐城。合都軍攻安慶。則水陸馬步名將精卒萃於百里之內。功必可成。續賓以奉

詔。催不敢他顧。遂力進。而發書湖北。請益師。續賓弟續宜將四千餘人屯黃岡。唐訓方將三千人。道英山。援淮北。未行。胡林翼已持喪歸。官文告司道。續賓用兵如神。無所用。援續賓。雖乞師。終不肯留兵。示弱。則進攻三河。十月。令丁銳義等攻河南。黃勝日等出東北。李續燾等攻西。續賓居中策應。甲辰。九壘皆克。俘斬七千。官軍傷亡千餘。眾懼。乃增調後軍。未至。三河守賊已飛書乞援。偽英王陳玉成自

江浦廬江西上。僞侍王李世賢糾捻酋張洛刑自廬郡至。金牛鎮。連營數十里。抄我軍後路。辛亥。續賓遣金國琛。毛有銘等乘夜趨金牛。黎明。次樊家渡。王家祠。遇賊至。戰不利。天忽霧。迷漫不見人。我軍左路先潰。中右兩路被襲。諸將多陣歿。士卒傷亡過半。歸路阻絕。續賓領親軍縱橫邊。決殺賊近二千。而七營已先陷。賊踞壘斷河隄。以截我圍。官軍數十重。續賓還營歎曰。今敗矣。取

詔書北面再拜焚之。令於軍曰。見月而走。月出。縱軍出營。四馳。續賓躍馬入賊陣。死之。曾國華等亦與難。道員孫守

信與諸將堅守營壘三日而敗。死之。又六日。桐城守兵亦敗。前後死者殆六千人。無苟活者。續賓號迪庵。湘鄉人。少從羅澤南學。爲人含宏淵默。稠人廣坐。終日不發一言。其選士以知恥近勇。樸誠敢戰爲尙。遇賊則以人當其脆。而已當其堅。糧仗則予人以善者。而已取其窳者。所屯軍地。百姓畊種不輟。萬幕無譁。秋毫不犯。他軍之將士逃難之流民皆歸之如父兄。大小六百餘戰。克四十餘城。口不言功。世尤多之。及其歿。遠近痛哭。舒桐難民負骸骨出事。聞文宗震悼。

手詔曰。覽奏不覺隕涕。惜我良將不克令終。尙冀忠靈不昧。他日生申甫以佐予也。

追贈總督。子諡忠武。湖北安徽江西湖南皆建祠。續賓死後。四城皆陷。都興阿等撤安慶圍。退屯宿松。

詔起復胡林翼。赴湖北視師。十一月。多隆阿鮑超大破賊於宿松。楚軍復振。和春遣將徇皖南。所部江長貴敗賊祁門。青陽。鄧紹良敗賊蕪湖。戴文英敗賊甯國。甯國賊陷。婺源。

詔張芾督皖南軍。官文駱秉章疏請曾國藩援皖。時國藩

率師援閩。駐江西建昌。閩浙總督王懿德請緩移師。  
文宗諭國藩酌緩急行。十二月。胡林翼至黃州。鮑超敗賊  
宿松北二郎河。賊氣稍阻。

九年二月。都興阿請疾。胡林翼以多隆阿領其軍。馬步五  
千當前敵。立蔣凝學爲大將。合鮑超唐訓方軍萬五千。陳  
玉成還江浦。留太湖賊數萬與我相持。時李孟羣壁廬州  
西。賊自六安犯宮亭長城營。丙辰。李孟荃鄧清兩營皆陷。  
遂摩孟羣壘。孟羣戰不利。猶手刃三人。力竭死之。孟羣卿  
穀子。以廣西知縣從戎。戰略爲時所稱。在軍雅歌賦詩。闕

達自喜。領兵旣多。餉益不繼。皖北赤地千里。遂困憊不能  
振。父子死王事。淮楚人皆哀之。皖南軍復婺源。三月。勝保  
駐軍正陽關。茅念劬克六安霍山。五月。陳玉成陷盱眙。勝  
保軍復之。六月。賊分黨犯定遠。前淮揚道郭沛霖知縣周  
佩濂死之。八月。勝保軍敗賊盱眙東。多隆阿鮑超克石牌。  
石牌當安慶西南。賊作大城。與太湖相犄。我軍攻城。安慶  
潛山賊分道來援。馬隊要擊敗之。十月。楚軍大舉攻太湖。  
增余際昌等九營助戰守。奪潛山之天堂。先是曾國藩奉  
命援蜀。還駐黃州。官文胡林翼言皖事急。兵不宜西。漕督

袁甲三則議令國藩由河南光固遏賊北竄。

詔國藩籌論全局。國藩奏中原腹地莫重於皖。生民苦厄莫甚於皖。臣自應先其所急。詳考入皖形勢。須分四路。南則循江而下。一由宿松石牌以規安慶。一由太湖潛山以取桐城。北則循山而進。一由英山霍山以取舒城。一由商城六安以規廬州。南軍駐石牌。則可與楊載福黃石磯之師聯爲一氣。北軍至六安。則可與翁同書壽州之師聯爲一氣。自洪楊內亂。金陵逆首凶燄久衰。徒以陳玉成往來江北。句結捻匪。遂令皖北之糜爛日廣。江南之賊糧不絕。

竊以爲欲廓清諸路。必先攻破金陵。欲破金陵。必先圍安慶。以破洪逆之老巢。兼搗廬州。以攻陳逆之所必救。

文宗深韙其言。十一月。國藩移駐宿松。彭玉麐復池州。僞國宗韋志俊降。其黨古隆賢復攻陷之。十二月。胡林翼移駐英山。時多隆阿新貴。諸將不樂出其下。於是鮑超求去。而多隆阿亦請疾。林翼憂之。計諸將惟曾國荃才地洽眾望。欲令總諸軍。國荃謝曰。多將軍忠勇絕倫。常疑吾輩輕武職。國荃請爲之下。則眾將自輯睦。林翼大喜曰。公能如此。

國之福也。乃奏以多隆阿總統各軍。多隆阿既爲諸軍長。則撤太湖圍。檄鮑超屯小池驛當前敵。移蔣凝學軍爲超後援。而自將居新倉。與賊偪。賊循潛山西太湖東連營百數。丙辰。攻超營。丁巳。多隆阿率凝學攻賊營。以救超。破其壘十三。我軍傷亡七百人。賊攻超益亟。番休迭進。歷六晝夜。國藩盡發宿松屯兵九千人圍太湖。而移太湖圍師。唐訓方三千人援小池。林翼益調麻城防兵以千人益新倉。二千五百人助攻太湖。又合兵二千防官軍後。多隆阿分親軍入超營助守。將士死亡相救。如手足之捍其身云。

十年正月辛未。唐訓方移屯小池。築壘未就。賊大至。戰不利。退屯新倉。林翼先遣金國琛。余際昌將九千人出天堂。謀夾擊。所謂山內之軍也。自除夕入山。冒雨行十日。至高橫嶺。望官軍寇壘。皆在目中。乙亥。賊來攻。際昌破之。國琛屯仰天凸。賊乘霧登山。我軍突起躡之。磔其酋。多隆阿增千五百人屯小池。國藩益三千五百人屯新倉。時大雨連朝。山內軍與山外軍鳴角發礮聲相應。賊稍懼。暗移軍近太湖。辛卯。多隆阿自將五千。合鮑超。唐訓方。蔣凝學。朱品隆。萬四千人。會攻賊。連敗之。壬辰。平旦。分三道東攻小池。

西攻羅山。中攻東堰。陳玉成精兵據羅山。既合戰。多隆阿併西中軍攻山間。賊亦大出眾當之。馬軍突而前。賊稍卻。蔣凝學連破賊卡。攻入山內。朱品隆越山而進。馬隊繼之。山賊多墜澗谷死。時小池賊分四道抄我軍。鮑超唐訓方合擊先敗之。遂合軍燒賊營。東南風大急。燎及山腰。賊棄壘走二十里。軍械委積。夜太湖賊遁。甲午。潛山賊亦遁。是役斬馘二萬。爲入皖第一大戰云。翁同書遣軍克白鑪橋。進規定遠。皖南軍禦賊涇縣。敗績。賊陷涇旌德。二月戊戌。陷廣德。入浙邊。巡撫羅遵殿乞援國藩。以蕭翰慶等六千

人援浙。未至。杭州陷。三月。議以國藩所部萬人圍安慶。多隆阿領萬人圍桐城。李續宜領萬人屯青草壩爲援。皖南軍復績溪。閏三月。江南大營陷。胡林翼與國藩議。以曾國荃領安慶軍屯集賢關。是爲規復安徽之始。蕭翰慶克太平。江長貴克旌德石埭。四月。蘇州陷。

詔國藩署兩江總督。國藩行兵務持重。議將進甯國。猶惡其險。乃移屯祁門。乞林翼假鮑超全軍。而自將朱品隆張運蘭合萬一千人以行。楊載福彭玉麐水師敗賊樅陽。五月。國藩自宿松至安慶。視水師。議建淮陽甯國太湖水師。

戊申渡江。六月癸酉至祁門。檄李元度募軍三千。左宗棠已奉

詔襄辦。則令領五千人。鮑超假還夔。張運蘭在郴。俱期八月會兵。罷張芾皖南督師。以曾國藩兼之。令周天受聽調遣。七月多隆阿進攻求雨嶺。嶺勢臨城。賊作石壘與輒壘。水堡相輔。己酉多隆阿率三千人出嶺後。佯列騎兵攻城。夜半嶺後軍聞登。賊憑壘自固。未之備。多隆阿令軍士築礮台。比曉成三台。俯瞰城壘。瞭然在目。賊驚爲神。始爭閉守。無鬪志矣。八月楊輔清賴裕新古隆賢合攻甯國。陷

之。周天受戰死。李世賢率四萬眾出廣德。犯徽州。曾國藩欲自將守徽。使朱品隆覘地形。品隆言非精兵二萬不可。前督師張芾軍萬人分防諸隘。實不任戰守。軍餉久乏。倉卒遣散。以索餉雜居城中。國藩以李元度前守貴溪有功。令權皖南道。元度亦自許能守之。至徽三日。土匪散軍結連甯國賊。而旌德賊繞績溪闌入叢山關。元度乞援國藩。時鮑超假還。張運蘭攻旌德。爲賊所絀。乃以散軍四營往。則賊已大至。四營潰。還走休甯。徽州城中軍大奔。元度遂南度開化。癸未徽州陷。前皖南道福咸死之。國藩急檄運

蘭還而促鮑超赴軍自太平南還屯漁亭賊益西趨陷休甯將攻祁門軍中大震從吏皆請國藩亟去國藩策賊必嚮東南窺空虛乃咨左宗棠率新軍屯樂平賊果分陷淳安嚴州九月鮑超張運蘭合攻休甯賊敗之十月壬戌楊載福水師援南陵拔難民十餘萬人賊偪祁門國藩移鮑超屯西館張運蘭屯迪祥湖距休甯城十餘里甲子賊由榔市來犯運蘭逆戰敗之丁丑復敗之萬安街李秀成自將數萬眾出羊棧嶺陷黟縣庚辰超運蘭攻克之是時環祁門無安土屯軍皆斂兵自守或勸曾國荃輟安慶圍救

大營國荃曰賊正欲牽我軍耳奈何爲所誤攻益力陳玉成見圍師終不退乃率十萬眾援安慶國荃屢擊屢破之玉成則走桐城增壘不戰多隆阿屯掛車約李續宜夾擊弗能克戊子多隆阿自掛車掠賊壘而北續宜自新安渡掠壘而南賊不能守則出戰兩軍奮擊大破之玉成走廬江十一月癸巳池州賊陷建德守將普承堯師潰國藩遣唐義訓統祁門各軍往援禦賊利涉口破其壘追至三里街賊棄城逸李秀成踞羊棧嶺窺祁門尤迫近國藩遣楊鎮魁等屯盧村拒之丙午賊襲盧村張運蘭援擊卻之戊



申賊益添嶺外軍。國藩密遣宋國永繞黟縣，由盧村進。張天習繞嶺外，斷賊歸路。比交鋒，前後突出，賊潰走。追者反出其前，輒墜巖，挂樹死。

十一年正月乙未，石埭賊犯祁門。江長貴敗之大洪嶺。黃惠清禦賊大赤嶺，失利。丁酉，唐義訓敗賊石門橋。賊踰大赤嶺，逸乙卯。左鮑軍復建德。左軍獨攻婺源，中伏，引還鄱陽。鮑超渡江，助攻安慶。二月，池州賊踰嶺趨祁門。國藩遣朱品隆、江長貴拒走之。國藩初屯祁門，倚糧江西。至是糧運三十日不至，眾爭言取徽州可自立，兼資餉於浙。三月

庚寅，國藩自將祁門軍。至休甯，徵黟防軍會師。癸巳，督攻徽州。大雨不克。甲午，還休甯。戊戌，復進。庚子，賊夜出驚我軍。八營皆潰。辛丑，遣各軍還營。國藩誓死守，留休甯。諸將皆諫弗聽。其弟國荃自安慶餉米數千石，且謂株守偏陬無益，宜出大江，規全局。國藩喟然從之。時楚軍全力謀皖，曾國荃頓兵安慶，日夜與賊搏戰。胡林翼駐太湖，策應陳玉成，乃北出英山，破蘄黃，遂北踞德安。南則另股攻江西郡縣，出義甯，擾崇通。東由衢州至於處州，欲多方誤我，爲解圍之計。玉成留黨守德安，而自領精銳回安慶。辛丑，至

太湖多隆阿遣軍嘗之戰不利眾請增軍多隆阿令皆還保大營賊疾趨安慶丙午入集賢關守賊葉芸來先已往淮北約捻黨二十餘萬人渡淮會玉成攻國荃軍於菱湖北岸築壘十三南岸築壘五參差相聯賊燒關內廬舍火光燭天城賊更番出襲南北岸羣賊分起應之多置小舟於湖中通往來庚戌國荃屬楊載福舩礮船數十入湖以其弟曾貞幹蕭孚泗出濠衛之賊捲甲疾趨圍孚泗軍貞幹救之出蔡國祥水師已入菱湖奪賊船載福增遣唐學發舩板助戰擊傷益眾玉成日增礮壘偏我營國荃與眾

謀曰賊壘縱橫宜據東路湖邊泊水師築壘護之乃可制賊命甲寅遣貞幹等出東路橫濠倚水修壘玉成死力來爭我軍且築且拒戰一晝夜壘成賊氣始阻時林紹璋洪仁玕黃文金亦率悍黨援安慶多隆阿邀擊於新安渡大破之四月乙未朔國藩率五百人移屯東流留朱品隆守祁門張運蘭守休甯江長貴守柏溪唐義訓守漁亭沈寶成守歷口楊占魁守羊棧嶺國藩既出江益規畫取安慶陳玉成屢挫於多隆阿還屯集賢關適曾國荃輕騎至關外偵地勢與賊遇賊大股分路躡之國荃所部不滿二百

據險列陣以待賊疑有伏愕而止國荃縱騎還擊大破之  
玉成自馬踏石鼻水夜遁留悍黨守赤崗嶺四壘與關內  
十三壘相聯國荃增掘長濠包菱湖羣壘俱在圍內賊計  
始困當玉成之遁多隆阿遣軍尾追己巳玉成糾林紹璋  
洪仁玕黃文金暨捻酋孫葵心馬步三萬眾自挂車河崱  
崱尖斜迤棋盤嶺延綿二十里分三路橫我軍次日黎明  
多隆阿分軍設伏自率勁旅迎戰至河邊與羣酋還戰方  
酣伏起賊後軍忽亂玉成遮敗寇回戰而項家河賊營爲  
伏軍焚賊驚潰傍山奔桐城於是新立八壘皆克五月曾

國荃合鮑超攻赤崗嶺七晝夜下之盡殲其眾超移援江  
西湘軍威聲益盛守賊多墜城詣國荃降六月戊午朔國  
荃攻菱湖北岸十三壘南岸五壘悉破平之七月陳玉成  
復約楊輔清率十餘萬人自無爲趨英山繞宿松逕襲太  
湖分軍出高樓嶺攻桐城軍而悉眾趣安慶國荃偵知之  
先率精兵伏要路賊至突擊裏賊而戰殺傷數千人胡林  
翼擊破太湖賊多隆阿復敗桐城賊於挂車玉成退屯石  
牌仍分黨援安慶時城外賊壘破壞略盡國荃攻東門月  
城燬之惟北門餘石壘三皆死黨踞之堅不可拔國荃召

驍將程學啟親爵之曰必克三壘。學啟選勇士數百人緣礮穴而入。戰於壘中。斬千餘人。擒三百七十人。三壘皆下。陳玉成既屢敗。復收餘眾。增約捻黨。屯集賢關內。分四十餘壘。丙午。攻國荃軍。襲其後。國荃不爲動。賊踰濠逼壘。則開壁大戰。斬寇帥數人。賊踰濠而遁。國荃軍蹙之。仆於濠者不可勝數。戊申。賊復以死黨度濠。國荃選壯士持短兵迎斫之。戰良久。血肉相藉。賊稍卻。國荃親督軍益新壘。環濠左右。伏精兵。葉芸來傾巢出。由鹽河至十里鋪。東撲新壘。玉成自城外應之。親援桴鼓督陣。殺不前者。國荃揮眾

禦賊而版築如故。自夜達旦。新壘成。殲悍賊三千。尸骸積田隴。羣賊既屢挫。糧不給。復築壘菱湖北岸。舁小艇泛湖。以齎糧入城。國荃遣貞幹亦作壘菱湖。合水師蔡國祥絕賊糧。而暗令軍士鑿穴埋地雷。八月丁巳朔。火發。北城坍。國荃揮軍登堞。斬萬六千級。俘數千人。其自南門逸者。後軍追擊之。多擠於江。遂克安慶。陳玉成楊輔清洪仁玕遠望膽落。皆遁走。是時

文宗方狩熱河。洋兵屯天津未退。中外疑懼。苗沛霖反側淮上。與金陵賊相結。而江蘇浙江列郡皆陷。皖南賊環逼

祁門國藩日夜憂惶胡林翼屯太湖議者亦多勸其退兵安慶捷聞南北軍皆相賀林翼病甚強起草奏而

文宗已崩林翼亦薨

穆宗立獎國藩林翼太子少保國荃由道員賞布政使銜以按察使記名彭玉麐爲安徽巡撫移前巡撫李續宜撫湖北皆辭

詔還續宜安徽是時楊載福水師克池州銅陵多隆阿克桐城舒城宿松黃梅湘軍所向皆捷國藩移駐安慶是爲肅清東南之始九月丙戌曾國荃率師東征辛丑克泥汊

口甲辰克神塘河乙巳薄無爲州先是賊酋馬玉堂妻子在安慶國荃執不殺諭降玉堂寇帥陰覺之擊玉堂其黨大譁互相攻殺聲達城外國荃乘亂擊之賊開北門逸無爲復進攻運漕鎮運漕鎮者外瀕江內通巢湖賊運糧道也國荃遣王明山水師扼黃雒河遏巢湖行船自將攻運漕戊申克之甲寅遣黃翼升陳湜克東關於是安慶百里閒無賊壘國荃分軍守安慶無爲及運漕東關不足十月丙辰朔國荃還安慶詣國藩議增兵當是時多隆阿將二萬人攻廬州李續宜部將蔣凝學等將萬人屯六安霍山

左宗棠軍屯婺源。張運蘭等屯徽州。李元度新軍出廣信防浙。而皖北賊聚保廬州。諸將爭謀進取。國荃勝兵八千。防新克城隘。乃令國荃回湘增募六千人。規金陵。而左宗棠將大舉援浙。鮑超、朱品隆等合軍攻甯國。凡五道並進。湘軍威名聞天下。中外交論其功。疆帥爭疏請援。朝廷益倚重國藩。

詔節制江浙四省。國藩屢讓不拜。薦左宗棠專浙事。分徵防諸將隸之。十一月。杭州陷。賊分犯徽州。守將朱品隆戰不利。唐義訓因隙弗相救。國藩切責之。義訓品隆上書悔懼。七戰皆捷。十二月。鮑超敗賊青陽。朱品隆敗賊徽州。賊解圍遁。

同治元年正月。授曾國藩協辦大學士。曾國荃浙江按察使。

朝廷以杭州陷。松滬危急。議令國荃率師出上海。規蘇常。屢

詔促兵。國荃時在湘。國藩郵書商之。國荃答曰。松滬財賦甲天下。籌餉易。然賊巢在金陵。急攻其巢。必以全力援救。而後蘇杭可圖。願任其難者。國藩壯其謀。因以金陵屬國

荃而薦道員李鴻章習兵事堪疆寄乃擇湘軍良將增募  
廬淝健兒乘輪船東下淮軍興矣二月國荃新軍自安慶  
東下三月克巢縣含山和州至裕溪口其弟貞幹克繁昌  
至南陵鮑超克青陽石埭太平至涇彭玉麟水師中江而  
下至金柱關當是時國藩建節安慶指麾眾軍曾國荃徇  
江北曾貞幹鮑超徇江南彭玉麟左右應之是爲進取金  
陵之師李鴻章率湘淮陸勇佐以黃翼升水軍出上海是  
爲謀取蘇州之師左宗棠由徽州進嚴衢是爲規取全浙  
之師皖北則多隆阿攻廬之師李續宜援潁之師皆秉承

節度其他袁甲三及李世忠淮上之師都與阿揚州之師  
馮子材魁玉鎮江之師奉

旨兼顧廣輪數千里呼吸相通

朝廷擇將帥往往

溫旨垂詢所論薦皆一時才雋或偶獎一士卽越資超擢  
疑爲異材海內英俊風驅爭鶩於功名矣四月甲寅張運  
蘭克旌德丁卯多隆阿克廬州自安慶之捷陳玉成狼狽  
西奔將趨湖北德安招其黨羣酋不從乘夜由六安走廬  
州眾漸攜貳洪酋切責之玉成懼屯廬州城東弗敢去多

隆阿遣雷正綰攻東南門石清吉攻西門別約皖軍張德勝設伏北門誘敵玉成恃驍悍率三千人抄我軍正綰迎擊勝之玉成退據城北浮橋城賊開北門出大眾謀合擊正綰軍方出城見玉成退則驚以爲大敗玉成遽斷浮橋遏城賊使阻水反拒城賊愈驚自相蹂石清吉等梯西南以登羣賊皆狂奔斬數千級俘八百餘人拔難民七千餘人玉成走壽州以苗沛霖陰受僞封往乞援沛霖懼楚軍威又慮玉成襲奪已眾陽稱疾遣苗景開迎謁於中津渡於城具三千人食玉成餘黨猶二千既入館眾皆走城外

登堂見梏鎖始大罵沛霖縛而囚之及從者二十餘人將獻潁州勝保營捻酋張洛刑詞知糾黨至江口集謀劫奪沛霖擊走之既至潁勝保檻送京師至延津有

詔凌遲處死傳首皖豫玉成凶狠亞楊秀清而戰略過之軍中號四眼狗自韋楊相殺石酋遠竄洪秀全所恃者李秀成在蘇州玉成在安慶玉成既誅楚皖之間稍稍息肩矣壬申曾國荃引軍南渡克太平甲戌克蕪湖勝兵出皖境五月國荃進駐雨花台圍金陵語在金陵下篇六月丙寅鮑超克甯國超初破寒亭管家橋賊壘進攻抱龍關遂



湘軍誌 卷六  
圍甯國城賊與援賊分三屯各踞一門超先攻城西屯敗  
之南北屯各出眾攻官軍超分四軍擊之宋國永攻南屯  
燒二壘北屯賊棄壘遽奔城賊收眾入越日賊復出東門  
犯官軍未交鋒遽東走超自追之數十里賊反鬪超引軍  
作圓陣包賊賊舍騎步遯獲馬千匹乃還軍攻城城賊皆  
長跪莫敢拒戰遂復甯國而甯國縣賊將洪容海以城降  
超令先驅克廣德七月袁甲三以病免  
詔李續宜爲欽差大臣八月續宜遭母喪歸薦唐訓方自  
代

詔權安徽巡撫駐臨淮閏八月黃文金犯甯國鮑超自入  
城守之時瘟疫大作超不能軍宋國永遣軍禦賊新河莊  
敗績九月陳坤書犯金柱關十月蘇浙賊援金陵戰不利  
解圍去由九洑洲北渡陷含山巢縣和州遂踞運漕銅城  
關東關犯無爲其南走者合廣德賊西南掠績溪祁門徽  
甯安廬俱阻絕惟沿江上下恃水軍得相聯乃謀增陸師  
立李榕爲新軍留李鴻章部將張樹聲助廬桐戰守調還  
李續宜部將成大吉蕭慶衍等攻巢和又募五千人增國  
荃金陵圍師十一月庚戌唐義訓王文瑞復績溪戊午復

湘軍詩  
卷六  
三  
祁門丁卯楊岳斌擊賊三汊河連敗之乙亥楊岳斌羅逢  
元破賊護駕墩燒賊艇二百餘鮑超連敗賊於馬頭鎮楊  
柳鋪十二月壬午賊陷青陽丁亥彭玉麐蕭慶衍克運漕  
鎮己亥蕭慶衍敗賊銅城閘壬寅朱品隆復青陽

二年正月賊酋賴文鴻等擁六七萬眾踞大坑黃村辛亥  
圍涇守將易開俊吳廷華登陴擊卻之壬子鮑超自高祖  
山疾馳九十里入涇城癸丑出擊賊大破之追奔二十里  
甲寅超回軍高祖山賊方乘虛覬超營見霆軍幟自相恫  
喝曰超來矣皆潰走二月丁丑朔王可陞攻甯國賊燒其

小淮窰壘鮑超劉松山分攻梅嶺廟埠賊壘皆破之皖南  
賊犯休甯分掠建德西侵江西邊東繞池州圍青陽江北  
賊攻石澗毛有銘劉連捷營三月國荃遣彭毓橘援石澗  
彭玉麐水師繼之賊敗遁乙丑犯廬江吳長慶擊走之丁  
卯犯舒城蔣凝學擊走之己巳圍六安國藩檄鮑超自廬  
江往援劉連捷彭毓橘毛有銘自無爲往援超將至舒城  
賊解圍走四月癸未劉連捷會水師曾泗美克東關丙戌  
蕭慶衍彭毓橘克銅城閘甲午易開俊敗賊於涇之章家  
渡朱品隆敗賊青陽戊戌劉連捷蕭慶衍合鮑超軍復巢

縣庚子復含山辛丑復和州於是皖北賊全遁皖南賊燄亦衰六月苗沛霖陷壽州浙軍王文瑞復黟縣移甯國防軍何紹彩及水師援臨淮蔣凝學等防潁州霍邱七月江西賊回皖境圍青陽銅陵甯國涇皆被寇八月丙戌李榕援青陽敗潰時鮑超助攻金陵國藩檄超還援遣水軍喻俊明及國藩親軍喻吉三合江忠義席寶田軍先後至青陽尅期攻賊賊解圍走石埭超軍至南陵遂東攻建平九月賊酋古隆賢詣朱品隆降收復石埭太平旌德散遣降人四萬彭玉麐督水陸軍攻太平沿江諸壘平之十月鮑

超楊岳斌俱會師東壩易開俊自涇劉松山自甯國合軍收甯國縣東壩賊開壘迎官軍於是皖南與金陵軍勢息息相通洪酋已成檻獸矣

王定安曰曾文正初縮兩江所隸無完土渡江守祁門羣賊環而攻之欲死者數矣幕寮皆勸公去公弗聽其弟國荃方圍安慶流涕上書公感悟挈五百人移駐東流頃之安慶克東南大局因之轉圜假使曾公守祁門弗出賊環攻無已時城破身殉大事去矣余嘗聞曾公言吾初起兵遇敗危則有死心自吾去祁門而後乃知徒死無益而苟

湘軍誌 卷六 三  
生之可以圖後功也。曾公國荃頓兵堅城幾兩載。陳玉成百戰悍寇。遠攻鄰省。冀解圍。不得則歸而鬪穴中。曾軍堅屹不可撼。則縱橫出旁邑。多隆阿鮑超併力擊之。賊進退無所據。遂至誅滅。嗚呼。在祁門則如彼。居安慶則事機之順如此。存亡之機。閒不容髮。可不審諸。

湘軍記卷六

武昌范德培校字

